

ANALISIS KRITIS MAKNA RENDAH DAN MAKNA TINGGI DALAM KAMUS MALAYSIA DAN INDONESIA

Sanat Md.Nasir

Universiti Islam Antarabangsa Malaysia
sanat@iium.edu.my

Kertas kerja ini akan menganalisis secara kritis kata leksikal sebagai entri kamus yang mendukung konsep makna rendah dan tinggi yang terdapat dalam kamus kedua-dua buah negara. Makna rendah merujuk kepada maksud makna yang biasa seperti *cerdik* dengan maksud yang mudah mengerti atau licik manakala makna tinggi pula dikaitkan dengan makna amalan agama seperti *cerdik* dengan makna tinggi sebagai orang yang mengingati mati. Adakah bangsa yang serumpun dengan agama yang sama memperlihatkan persamaan dari segi makna rendah dan tinggi dalam kamus masing-masing? Kajian tentang isu ini masih baharu. Sanat (1998), (2015) dan (2016) membincangkan aspek ini dari pelbagai sudut, termasuklah hal yang berhubung dengan perbandingan kamus *Kitab Pengetahuan Bahasa* yang diusahakan oleh Raja Ali Haji pada pertengahan abad ke-19 dengan *Kamus Dewan*, dan perspektif pengguna tentang makna rendah dan tinggi dari pelbagai lapis masyarakat. Kajian ini menggunakan kerangka teori gabungan antara kerangka teori semantik leksikal melalui Model Semantik Paling Luas yang mengambil kira amalan agama dengan Model Wacana Mega. Model semantik dan wacana ini merupakan turunan daripada 'Teori' Atqakum Sanat (2005). Kertas kerja ini diharap dapat mengemukakan dapatan perbandingan tentang makna rendah dan tinggi dan manfaatnya dalam usaha memartabatkan kamus masing-masing sesuai dengan perkembangan masyarakatnya.

Kata kunci: kata leksikal, makna rendah, makna tinggi, semantik leksikal, semantik wacana

Pendahuluan

Isu makna tinggi dalam bidang semantik leksikal pertama kali timbul di Malaysia apabila pengkaji ditanya oleh seorang profesor tentang maksud makna tinggi di suatu seminar pada pertengahan tahun 90-an. Di sini makna tinggi merujuk kepada makna yang dikaitkan dengan imput agama. Dalam kajian ini, makna yang diperluas. Contoh **cerdik** dengan makna yang diperluas: yang mengingati mati. Oleh itu, sentiasa melakukan kebaikan untuk kejayaan di akhirat. Imput agama untuk makna tinggi leksikal **cerdik** dapat diambil daripada Abdullah bin Umar yang berkata:

“Aku bersama Rasulullah, kemudian datang seorang lelaki dari Ansar, memberi salam ke atas nabi SAW kemudian berkata: siapakah mukmin yang paling baik. Jawab nabi: yang paling bagus akhlaknya. Dia bertanya lagi: siapa pula yang paling *cerdik*? Nabi jawab: Mereka yang paling banyak mengingati mati dan melakukan persediaan selepas kematian itu, itulah orang yang paling *bijak*” (Hadith Riwayat Ibn Majah).

Juga, daripada Abi Ya'la Syaddad Bin Aus yang mengatakan Rasulullah S.A.W bersabda: “Orang yang cerdik ialah orang yang selalu memperhitungkan dirinya dan dia suka beramal untuk bekalan sesudah mati, sedangkan orang yang lemah (tidak cerdik) ialah orang yang selalu mengikuti hawa nafsunya dan hanya banyak berangan-angan kepada Allah SWT (untuk mendapat kebahagiaan dan

pengampunan daripada-Nya tanpa beramal soleh)” (Hadith Riwayat Imam At-Tirmizi).


Sebaliknya, Makna rendah merujuk kepada makna kamus yang biasa dimaksudkan tanpa makna khusus dalam sesuatu agama. Contoh **cerdik** dalam *Kamus Dewan Edisi Keempat* dalam talian bermaksud “1. dapat mengerti dgn cepat, berakal, pandai...; 2. banyak akal, licik, tahu tipu muslihat, pandai putar belit...”

Kata leksikal atau item leksikal di sini dirujuk sebagai entri dalam istilah leksikografi. Kata leksikal merujuk kepada makna penuh yang didukung oleh sesuatu kata berbanding dengan kata tugas yang mempunyai makna tatabahasa. Dan, bidang kajian makna yang menjurus pada tahap leksikal dinamakan sebagai semantik leksikal. Tahap ini paling rendah dan tahap yang paling tinggi ialah semantik wacana yang melibatkan makna wacana.

Pada tahun 1998, pengkaji memasukkan konsep makna tinggi selain makna rendah dalam artikel yang bertajuk “Konsep Penting Dalam Pengajian Bahasa Melayu”. Contoh yang dikemukakan ialah *mati* dalam makna tingginya yang berkait dengan para syuhada yang dikatakan ‘hidup’ seperti dalam al-Qurán (3:169).

Sebenarnya, Raja Ali Haji (1257H/1858M) telah memulakan usaha beliau melalui *Kitab Pengetahuan Bahasa* sekadar mampunya. Didapati ada beberapa entri yang berkaitan dengan makna tinggi.

Sanat (2015: 522-534) membincangkan makna rendah dan makna tinggi dalam dua buah kamus, iaitu *Kitab Pengetahuan Bahasa* dan *Kamus Dewan Edisi Keempat* dengan rumsan dapatan seperti dalam carta yang berikut. Carta tersebut menunjukkan 10 entri yang dianalisis. Kesemua entri itu bermakna tinggi dalam *Kitab Pengetahuan Bahasa* sedangkan hanya satu entri, **Tawakal**, mempunyai makna tinggi dalam *Kamus Dewan Edisi Keempat*. Dalam kamus ini juga, makna rendah didukung oleh sembilan entri, iaitu **Allah, Adab, Babi, Bebal, Bahagia, Janji, Judi, Curi, dan Cendikia**. **Allah** dan **Babi** diletakkan atas sedikit daripada yang lain kerana dikatakan ke arah makna tinggi.



Carta Makna Rendah dan Makna Tinggi Entri Kedua-dua Kamus

Pada satu seminar PULARA 2016 di Pulau Pangkor, Perak, pengkaji membentangkan kertas kerjanya yang bertajuk “Kudrat Bahasa Melayu Melalui Makna Tinggi: Perspektif Pengguna” dengan tujuan untuk mendapatkan hubungan pola jawapan dengan entri makna tinggi daripada pengguna bahasa Melayu dan untuk menunjukkan hubungan pola jawapan dengan kekerapan pilihan pengguna bagi makna

tinggi. Didapati daripada 64 responden yang menjawab soal selidik, yang bersetuju dengan makna tinggi **adil** paling ramai 61(95.3%) manakala yang tidak bersetuju dengan makna tinggi **cerdik**, yang tertinggi 4 (6.4 %). Hal ini menggambarkan responden sudah terbiasa dengan makna tinggi **adil** yang bermaksud “ meletakkan sesuatu perkara itu pada tempatnya sehingga tidak menzalimi kerana semata-mata ingin melakukan taqwa dan mencari keredhaan Allah”. Manakala makna tinggi **cerdik** yang tertinggi tidak dipersetujui boleh dianggap kurang difahami responden kerana bermaksud “yang mengingati mati. Oleh itu, sentiasa melakukan kebaikan untuk kejayaan di akhirat”. Pengaruh makna rendah **cerdik** masih kuat kerana antara lain bermaksud “1. dapat mengerti dgn cepat, berakal, pandai...;” Namun, makna tinggi **cerdik** secara perbandingan tetap ramai yang memilihnya, iaitu 47 (73.4%).

Jika dilihat dari segi kajian lepas, terdapat fenomena rosotan antara zaman Raja Haji Ali pada abad ke-19 dengan abad ke-21 sekarang di Malaysia dalam pemahaman makna tinggi yang terakam dalam kamus. Adakah hal yang sama berlaku di Indonesia dengan mengambil kira tokoh besar Raja Ali Haji sendiri dari Indonesia? Oleh itu, kajian kali ini ingin menganalisis secara kritis kata leksikal sebagai entri kamus yang mendukung konsep makna rendah (MR) dan tinggi (MT) yang terdapat dalam kamus kedua-dua buah negara. Kamus yang dimaksudkan ialah Kamus Dewan Dalam Talian (KD) di Malaysia dan Kamus Besar Bahasa Indonesia Dalam Jaringan (KBBI) di Indonesia.

Kajian ini diharap hasilnya dapat dijadikan sebagai bukti pengungkapan makna rendah dan makna tinggi yang terdapat dalam kedua-dua buah negara melalui kamus masing-masing. Sekali gus, dapat dimanfaatkan dalam bentuk merencanakan kemasukan makna tinggi dalam kedua-dua kamus tersebut demi untuk menampung keperluan pengguna terhadap makna tinggi di kedua-dua buah negara khususnya dan di seluruh dunia pada amnya.

Dapatan dan Perbincangan

Sebanyak 10 entri dicari dalam kedua-dua kamus, iaitu KD dan KBBI dan analisis sepenuhnya entri tersebut ada dalam **Lampiran**. Dapatannya dicartakan seperti yang ditunjukkan dalam **Carta Makna Rendah dan Makna Tinggi Entri KD dan KBBI** di bawah.

Tiada makna tinggi dalam KD, 0 (00.00%). Sebaliknya, terdapat satu makna tinggi dalam KBBI, 1 (10.00%), iaitu **Allah**. Lihat contoh:

1. **Allah**: “Ar Tuhan (Yang Esa)”. (KD) MR

(**Allah**: nama khas Tuhan dalam agama Islam yang Maha Besar dan Maha Mulia, wajib ada-Nya, Maha Pencipta dan apa jua sifat yang layak bagi-Nya... MT)

Allah “n nama Tuhan dalam bahasa Arab; pencipta alam semesta yang mahasempurna;

Tuhan Yang Maha Esa yang disembah oleh orang yang beriman: ...” (KBBI)
MT

Entri **Allah** dalam KD masih di peringkat → pertengahan, iaitu MT kerana fitur Allah Yang Esa dalam kurungan yang bermaksud pilihan. Sedangkan **Allah** di tahap MT dalam KBBI kerana ada fitur pencipta alam semesta yang maha sempurna dan Tuhan Yang Maha Esa tanpa kurungan. Tambahan lagi, Tuhan tersebut difiturkan untuk disembah oleh orang yang beriman. Biasanya, entri **Allah** sudah

sedia difahami untuk maksud makna tinggi tetapi entah bagaimana dalam KD tidak ditimbulkan secara sempurna untuk menjadikan bahawa Allah satu-satunya Tuhan yang Maha Sempurna, Maha Pencipta dan Tiada Tandingan dengan yang lain. Nama Allah perlu dikhususkan sifatnya sehingga tepat makna Allah sesuai dengan nama khas bukan manusia, Maha Hidup, Maha Nyata, dan Bukan Makhluq.

Di tahap → MT, KD satu entri, iaitu **Allah** (10.00%) manakala di tahap ini KBBI, 2 (20.00%), iaitu entri **Bahagia** dan **Mubazir** seperti dalam contoh di bawah.

- 2. Bahagia:** “1. suasana senang dan aman, aman damai serta gembira ... 2. = berbahagia beruntung ...” (KD) MR
(**Bahagia:** beruntung dan bertuah di akhirat jua. MT)

Bahagia “n 1. keadaan atau perasaan senang dan tenteram (bebas dari segala yang menyusahakan): -- *dunia akhirat; hidup penuh* --; 2 a beruntung; berbahagia: →” (KBBI) MR MT kerana ada contoh *akhirat*

- 10. Membazir:** “berlebih-lebihan sehingga terbuang;...” (KD) MR

(**Membazir:** membelanjakan atau memberikan sesuatu tidak pada yang dibenarkan dalam Islam dan sebagai tanda tidak bersyukur sehingga dinamakan sebagai berkawan dengan syaitan. MT)

Mubazir “ 1 a menjadi sia-sia atau tidak berguna; terbuang-buang (karena berlebihan): ... 2a berlebih(an):... 3a bersifat memboroskan; berlebihan; royal: ... *hal berlebih-lebihan yang mengarah pada sifat -- merupakan perbuatan tercela dalam agama*; 4 n orang yang berlaku boros; ~~pemboros~~; (KBBI) MT kerana ada contoh yang berkait dengan agama.

Oleh sebab entri **Allah** sudah diujulkan mengapa tidak sebagai MT tetapi → sekadar MT sahaja dalam KD, pengkaji hanya menyentuh dua entri lain dalam KBBI yang antara MR dengan MT, iaitu **Bahagia** dan **Mubazir** dalam contoh di atas. **Bahagia** dimasukkan dalam kategori menuju ke arah MT kerana dalam contoh yang diberikan ada soal dunia dan akhirat. Contoh: -- *dunia akhirat. Demikian juga dengan entri Mubazir, ada dalam contohnya yang melibatkan agama seperti ... hal berlebih-lebihan yang mengarah pada sifat -- merupakan perbuatan tercela dalam agama.*

Sembilan entri ((90.00%) daripada 10 entri dalam KD mempunyai MR. Entri tersebut ialah **Bahagia, Janji, Judi, Curi, Cerdik, Rugi, Mufliis, Adil, Membazir**. Semua ini tidak melibatkan kaitan agama dalam pemerriannya. Demikian juga dengan tujuh entri (70.%) dalam KBBI, iaitu **Janji, Judi, Curi, Cerdik, Rugi, Mufliis, Adil**.

Daripada pemaparan di atas, ternyata KD masih jauh lebih banyak pada tahap MR berbanding KBBI. KBBI menahap lebih tinggi dalam MT dan MT. Arah aliran seperti ini menggambarkan susuk kesedaran pihak pembuat kamus untuk menepati pemakaian MT oleh pengguna di Indonesia berbanding dengan yang di Malaysia. Ini tentunya menjadi fenomena baharu yang sedang berkembang.

Kamus Dewan Dalam Talian (KD) Kamus Besar Bahasa Indonesia Dalam Jaringan (KBBI)

Makna Tinggi

(Tiada)

(Allah)

Makna Tinggi

(Allah)

(Bahagia, Mubazir)


(Bahagia, Janji, Judi, Curi, Cerdik, Adil)


(Janji, Judi, Curi, Cerdik, Rugi, Mufliis,

Rugi, Mufliis, Adil, Membazir)

Carta Makna Rendah dan Makna Tinggi Entri KD dan KBBI

Carta di atas dapat digembleng dalam ‘Teori’ Atqakum yang menurunkan Model Semantik Paling Luas dan Model Wacana Mega. ‘Teori’ di sini merujuk kepada maksud Hukum dan Atqakum bermaksud paling bertaqwa. Konsep Paling Luas dalam Model Semantik dan Mega dalam Model Wacana mengisyaratkan keperluan kepada amalan agama. Makna tinggi sesuatu leksikal seperti **Allah** mengalami anjakan daripada makna rendah “Ar Tuhan (Yang Esa)” dalam KD kepada makna tinggi “n nama Tuhan dalam bahasa Arab; pencipta alam semesta yang mahasempurna; Tuhan Yang Maha Esa yang disembah oleh orang yang beriman: ...” . Anjakan ini biasa disebut dalam semantik juga semiotik sebagai makna rendah dalam Rajah Segi Tiga Pertama menjadi lambang dalam Rajah Segi Tiga Kedua yang akhirnya menghasikan makna tinggi. Lingkaran bulat yang terdapat dalam Rajah Segi Tiga Kedua itu memberikan maksud hubungan agama baik yang mencecah bucu Lambang, Rujukan mahupun bucu Makna yang sekali gus membawa makna tinggi. Lingkaran bulat tersebut tidak dilakarkan menyentuh setiap bucu memandangkan Model Semantik Paling Luas itu terlebur dalam Teks Model Wacana Mega yang mempunyai lapisan lingkaran bulat. Teks dalam Model Wacana Mega sebagai asas lambang bahasa dalam penggunaan yang bermakna dan dalam hal ini makna tinggi. Kamus sebagai Teks ditingkatkan dalam Amalan Diskursif, iaitu dalam bentuk penghasilan, pengedaran dan pemakaian kamus. Kamus yang mengandungi entri leksikal **Allah** tersebut digunakan dalam Amalan Sosial dan seterusnya bergerak lagi dalam Amalan Agama sebagai lingkaran terakhir. Garis rentas daripada Teks kepada Amalan Agama bermaksud keserasian hubungan pada setiap garis tersebut dengan agama. Makna **Allah** mesti serasi di mana-mana titik rentas dengan makna tinggi. Sila lihat Rajah di bawah.





Rajah Gabungan Model Semantik Paling Luas Dengan Model Wacana Mega Kesimpulan

Telah dinyatakan belum ada dalam pemerian 10 entri yang dipilih dalam KD Malaysia di tahap MT berbanding dengan KBBI Indonesia. Ini ada kaitan dengan tahap kesedaran pemerian MT pembikin kamus untuk merakamkan tahap pemakaian pengguna. Semakin meningkat kesedaran pengguna dalam sesuatu masyarakat tentang makna tinggi, semakin perlulah sesebuah kamus masyarakat tersebut memerikan maksud sebenar pemakain makna itu. Manfaat kajian makna tinggi ini untuk kesedaran pembikin kamus akan wujudnya satu lagi jenis makna di samping makna rendah dan kesedaran pengguna untuk memakainya dalam rangka menjaga dan mengamalkan jenis makna tersebut selari dengan tuntutan *qaulan makrufa* demi kejayaan di dunia dan di akhirat. Selanjutnya, dicadangkan dibuat kajian lanjutan bersama tentang makna tinggi antara dua buah negara yang serumpun dan seasal bahasa demi kelanjutan bahasa kita sebagai bahasa serantau dan bahasa dunia.

Referensi

- Raja Ali Haji.(2010). *Kitab Pengetahuan Bahasa*. Dikaji dan diperkenalkan oleh Hashim Musa. Hassan Ahmad (Ketua Ed.) Kuala Lumpur: Yayasan Karyawan.
- Sanat Md.Nasir.(1998). Konsep penting dalam pengajian bahasa Melayu. Dlm. Sanat Md. Nasir dan Rogayah A. Razak (Ed.), *Pengajian Bahasa Melayu*, 113-125. Kuala Lumpur: Akademi Pengajian Melayu.
- _____. (2005). 'Teori' atqakum dalam pemikiran pengajian bahasa Melayu. Dlm. Hashim Musa (Ed.), *Bahasa Dan Pemikiran Melayu*. Kuala Lumpur: Akademi Pengajian Melayu.
- _____. (2006). Mencari Melayu dalam analisis wacana kritis, retorik dan kesantunan, dlm. Kamsiah Abdullah et al. (Ed.), *Budaya:Memeluk Akar Menyuluh Ke Langit*. Singapura:Jabatan Bahasa dan Budaya Melayu, Institut Pendidikan Nasional, Universiti Teknologi Nanyang.
- _____. (2015). Makna Rendah Makna Tinggi: Dimensi Baharu. *ICDETAH 2015 Proceedings*
- H. Zainuddin Hamidy dan Fachruddin Hs. (1991).*Tafsir Quran*. Cetakan Keempat, Klang: Klang Book Centre.

Lampiran

Analisis Entri Yang Terpilih *Kamus Dewan* Edisi Keempat Dalam Talian (KD) dan *Kamus Besar Bahasa Indonesia* (KBBI) Dalam Jaringan

1. Allah: “Ar Tuhan (Yang Esa)”. (KD) MR

(**Allah:** nama khas Tuhan dalam agama Islam yang Maha Besar dan Maha Mulia, wajib ada-Nya, Maha Pencipta dan apa jua sifat yang layak bagi-Nya... MT)

Allah “*n* nama Tuhan dalam bahasa Arab; pencipta alam semesta yang mahasempurna;

Tuhan Yang Maha Esa yang disembah oleh orang yang beriman: ...” (KBBI) MT

2. Bahagia: “1. suasana senang dan aman, aman damai serta gembira ... 2. = berbahagia beruntung ...” (KD) MR

(**Bahagia:** beruntung dan bertuah di akhirat jua. MT)

Bahagia “*n* 1. keadaan atau perasaan senang dan tenteram (bebas dari segala yang menyusahkan): -- *dunia akhirat; hidup penuh* --; 2 *a* beruntung; berbahagia: →” (KBBI) MR MT kerana ada contoh *akhirat*

3. Janji: “1. pernyataan kesediaan utk berbuat atau memberi sesuatu... 2. syarat, ketentuan, tuntutan ... 3. pengunduran waktu, tangguh, penundaan ... 4. ajal, had, waktu...” (KD) MR

(**Janji:** “kesediaan untuk menunaikan dan bersifat wajib jika tiada uzur syarī dan haram memungkirinya kerana akan ditanya di akhirat. Memungkirinya termasuk salah satu daripada tiga sifat orang munafik. MT)

Janji “*n* 1 ucapan yang menyatakan kesediaan dan kesanggupan untuk berbuat (seperti hendak memberi, menolong, datang, bertemu): ... 2 persetujuan antara dua pihak (masing-masing menyatakan kesediaan dan kesanggupan untuk berbuat atau tidak berbuat sesuatu): ... 3 syarat; ketentuan (yang harus dipenuhi): ... 4 penundaan waktu (membayar dan sebagainya); penangguhan: ... 5 batas waktu (hidup); ajal: ... (KBBI) MR

4. Judi: “permainan dgn memakai wang dll sbg taruhan ... ” (KD) MR

(**Judi:** permainan dan haram dalam agama Islam. MT)

Judi: “ *n* permainan dengan memakai uang atau barang berharga sebagai taruhan (seperti main dadu, kartu): ... ” (KBBI) MR

5. Curi: “... 1. mengambil kepunyaan orang tidak dgn kebenarannya, memaling ...” (KD) MR

(**Curi:** “mengambil hak orang yang lain dengan bersembunyi lagi zalim, berdosa besar yang mewajibkan had, iaitu dipotong tangannya hingga pergelangan tangannya, tetapi dengan beberapa syarat, ” MT)

Curi: “*v*, **mencuri**/men-cu-ri/ *v* mengambil milik orang lain tanpa izin atau dengan tidak sah, biasanya dengan sembunyi-sembunyi: ...” (KBBI) MR

6. **Cerdik:** “1. dapat mengerti dgn cepat, berakal, pandai...; 2. banyak akal, licik, tahu tipu muslihat, pandai putar belit...” (KD) MR
(**Cerdik:** yang mengingati mati. Oleh itu, sentiasa melakukan kebaikan untuk kejayaan di akhirat. MT)

Cerdik: “*a* 1 cepat mengerti (tentang situasi dan sebagainya) dan pandai mencari pemecahannya dan sebagainya; panjang akal: ... 2 banyak akal nya (tipu muslihatnya); licik; licin: ...” (KBBI) MR

7. **Rugi:** “1. (dijual dll) lebih rendah drpd harga pokok, tidak mendapat keuntungan; 2. kesusutan modal (kerana menjual lebih rendah drpd harga pokok; 3. tidak mendapat faedah (manfaat), tidak ada gunanya, sia-sia sahaja: 4. sesuatu yg kurang baik (tidak berfaedah), mudarat; 5. hilang, habis (wang dll) ...”(KD) MR
(**Rugi:** yang kafir di dunia dan masuk ke neraka di akhirat. MT)

Rugi: “ 1 *a* (terjual) kurang dari harga beli atau modalnya; tidak mendapat laba: ... 2 *a* kurang dari modal (karena menjual lebih rendah daripada harga pokok): ... 3 *a* tidak mendapat faedah (manfaat); tidak beroleh sesuatu yang berguna: ... 4 *n* sesuatu yang kurang baik (tidak menguntungkan); mudarat: ... (KBBI) MR

8. **Mufliis:** “Ar tidak sanggup (berupaya) membayar hutang, bankrap; ...” (KD) MR

(**Mufliis:** “yang ketika di akhirat kelak tidak dapat membayar kejahatan yang dilakukan kepada orang lain dengan pahalanya sehingga dosa orang lain pula perlu diterimanya. MT)

Mufliis: “*Ar a* tidak mampu membayar utang; bangkrut” (KBBI) MR

9. **Adil:** “1 berpihak kpd yg benar dan yg hak; berpegang pd kebenaran. 2 tidak berat sebelah (dlm memberikan layanan dsb); tidak melebihi yg satu drpd yg lain. 3 tidak berlebih-lebihan dan tidak kurang pula drpd yg sepatutnya (ttg sesuatu tuntutan dll); ...” (KD) MR

(**Adil:** yang meletakkan sesuatu perkara itu pada tempatnya sehingga tidak menzalimi kerana semata-mata ingin melakukan taqwa dan mencari keredhaan Allah. MT)

Adil: “ *a* 1 sama berat; tidak berat sebelah; tidak memihak: ... 2 berpihak kepada yang benar; berpegang pada kebenaran; 3 sepatutnya; tidak sewenang-wenang: ...” (KBBI) MR

10. **Membazir:** “berlebih-lebihan sehingga terbuang;...” (KD) MR

(**Membazir:** membelanjakan atau memberikan sesuatu tidak pada yang dibenarkan dalam Islam dan sebagai tanda tidak bersyukur sehingga dinamakan sebagai berkawan dengan syaitan. MT)

Mubazir “ 1 *a* menjadi sia-sia atau tidak berguna; terbuang-buang (karena berlebihan): ... 2*a* berlebih(an):... 3*a* bersifat memboroskan; berlebihan; royal: ... *hal berlebih-lebihan yang mengarah pada sifat -- merupakan perbuatan tercela dalam agama; 4 n* orang yang berlaku boros; pemboros; (KBBI) MT kerana ada contoh yang berkait dengan agama. ➔